

KEPENTINGAN PERANCANGAN HARTA DALAM TEMPOH PERKAHWINAN:SATU KAJIAN LITERATUR

TUAN NURHAFIZA RAJA ABDUL AZIZ,
tuan.nurhafiza@kuis.edu.my

NURHAYATI ABDUL GHANI
nurhayatiag@kuis.edu.my
MAFFUZA SALLEH
maffuza@kuis.edu.my

Fakulti Syariah Dan Undang-Undang,
Kolej Unversiti Islam Antarabangsa Selangor (KUIS)

ABSTRAK

Perancangan harta merupakan suatu perancangan untuk menentukan dan mentadbir pengurusan harta yang dimiliki oleh seseorang sepanjang kehidupannya dan perancangan selepas kematiannya. Perancangan harta amatlah penting untuk memelihara kemaslahatan atau kepentingan manusia dalam menjalani kehidupan di dunia dan juga bertujuan memelihara kepentingan manusia selepas kematian. Kegagalan untuk membuat perancangan harta dengan baik memberi kesan yang amat besar apabila berlakunya kes perceraian atau kematian, dimana pasangan yang ditinggalkan kehilangan arah untuk meneruskan kehidupan apabila timbulnya masalah-masalah seperti perebutan harta pusaka, penafian hak harta sepencarian ke atas pasangan yang ditinggalkan dan masalah harta beku. Kajian ini bertujuan mengenalpasti kepentingan perancangan harta dalam tempoh perkahwinan. Kajian ini merupakan kajian literatur melalui analisis kandungan dan dihuraikan secara deskriptif. Pengumpulan diperoleh daripada penulisan ilmiah seperti tesis, disertasi, buku, jurnal, kertas kerja, seminar prosiding dan laman sesawang yang berautoriti. Hasil kajian mendapati masyarakat Malaysia khususnya orang Islam kurang berpengetahuan terhadap kepentingan dalam menguruskan harta. Kajian ini memberi impak kepada pasangan yang berkahwin khususnya pasangan muda sebagai persediaan dalam menghadapi sebarang kemungkinan yang akan berlaku sekiranya berlaku perceraian atau kematian agar dapat mengurus dan merancang harta dengan baik bagi kehidupan yang lebih terjamin.

Kata Kunci: kepentingan, literatur, perancangan harta, perkahwinan.

1. Pendahuluan

Perancangan harta adalah suatu perancangan yang mampu dilaksanakan cara mana seseorang semasa hayatnya memperoleh, mengurus dan mengagihkan hartanya kepada waris-waris dan benifisiari mengikut budi bicara serta adil disamping ia dapat mengawal, memantau dan memanfaatkan harta itu untuk penerima, dirinya dan keluarga semasa hayat dan selepas kematian (Othman Yaacob, 2006). Ini membolehkan seseorang itu menentukan perjalanan hartanya dan kepada siapakah hartanya patut diberikan dan ia sah dari segi undang-undang sama ada sivil mahupun syariah.

Kajian yang dibuat oleh Rusnadewi & Noor Inayah (2013) mendapati, masyarakat di negara ini kurang mempunyai kecenderungan untuk membuat perancangan pengagihan harta secara teliti terutamanya dalam membuat perancangan awal. Kesan daripada itu, mereka telah bergantung sepenuhnya kepada sistem pewarisan harta selepas kematian iaitu pembahagian secara farāid. Oleh yang demikian, persepsi masyarakat yang berpandangan bahawa perancangan awal pengagihan harta tidak diperlukan sama sekali memandangkan harta boleh diagihkan melalui sistem farāid sewajarnya dikikis. Sebaliknya, perancangan pengagihan harta semasa hidup seperti

pemberian melalui hibah dan wasiat perlu dipertingkatkan bagi mengelakkan masalah tersebut kerana ia jelas merugikan masyarakat Islam.

Walaupun konsep pengurusan harta telah diiktiraf dalam Islam dan mempunyai manfaat dan tujuan kebaikan, namun malangnya, masih ramai di kalangan masyarakat di negara ini mempunyai persepsi bahawa perancangan harta tidak diperlukan sama sekali kerana Islam telah memperuntukkan mengenai faraid sebagai kaedah pembahagian harta selepas kematian. Mereka dilihat kurang berminat untuk membuat perancangan rapi, terutamanya dari sudut persiapan pengagihan harta sebelum mereka meninggal dunia. Masalah kegagalan dan kelewatan pengagihan harta pusaka di Malaysia timbul berikutan ramai yang tidak menyedari tentang keperluan dan kepentingan untuk membuat perancangan awal pengagihan harta.(Rusnadewi & Noor Inayah, 2010).

2. Metodologi

Kajian ini merupakan kajian literatur melalui analisis kandungan dan dihuraikan secara deskriptif. Pengumpulan diperoleh daripada penulisan ilmiah seperti tesis, disertasi, buku, jurnal, kertas kerja, seminar prosiding dan laman sesawang yang berautoriti berkenaan dengan kepentingan perancangan harta dalam perkahwinan.

3. Konsep Perancangan Harta

Menurut Muhamad Husni, et.al (2015), istilah perancangan harta merupakan gabungan daripada dua kata nama yang berbeza iaitu perancangan dan harta. Penulisan yang mengkaji tentang perancangan harta di luar negara sama ada buku mahupun artikel jurnal menggunakan istilah estate planning bagi merujuk kepada perancangan harta. Perancangan harta ditakrifkan sebagai *“providing for the desired personal, economics and legal consequences in the accumulation, conservation and distribution of your property. Its is process of arranging for the well being of your family and the use of your property to accomplish your objectives while you are living and after your death”* (*“providing for the desired,”* 2010). Perancangan harta juga adalah mempelajari tentang prinsip-prinsip perancangan terhadap penggunaan, penjagaan/ pemilikan dan perpindahan harta seseorang individu (Prestopino, 2004).

Clifford (2007) pula menyatakan bahawa perancangan harta adalah memutuskan siapa yang akan memperolehi harta selepas kematian pemilik harta dan membuat pilihan bagaimana harta tersebut akan dipindahmilikkan selepas berlakunya kematian. Menurut Mancer (1994), perancangan harta melibatkan penggunaan pelbagai cara yang sah di sisi undang-undang untuk memperolehi, memegang/memiliki harta dan kemudiannya memberikan/mengagihkan kepada orang lain khususnya donor dan pada masa yang sama mendapat kepuasan daripada rancangan yang dibuat.

Menurut Eu Jin (2004), perancangan harta merujuk kepada membuat ketetapan yang diperlukan bagaimana harta yang dimiliki sekarang ini akan dibahagikan apabila seseorang pemilik harta meninggal dunia. Ini bererti setiap individu perlu kepada pertimbangan untuk memikir, merancang dan mengambil langkah-langkah terhadap duit dan harta-harta lain yang dimiliki. Seharusnya merancang bagaimana mereka akan menguruskan harta tersebut dan siapakah yang akan menerimanya nanti. Menurut Kapoor (2003), perancangan harta merupakan suatu perancangan untuk menentukan dan mentadbir pengurusan terhadap harta pusaka yang dimiliki oleh seseorang sepanjang kehidupannya dan perancangan selepas kematiannya. Ini termasuk masalah mengenai kepada harta itu akan dibahagikan dan apakah yang akan dilakukan terhadap harta tersebut selepas kematian seseorang. Perancangan ini termasuklah dalam mengadakan dokumen seperti penulisan

wasiat dan membuat senarai terhadap kesemua harta untuk dibahagikan selepas berlakunya kematian (Tan C & Huan J, 2004). Bagi West David A., & Wood, Glenn L. (1972), perancangan harta bukan sahaja terbatas kepada pembahagian harta yang bagi orang yang telah meninggal mahupun hampir meninggal. Ia termasuk pembahagian harta semasa hidup.

Konsep perancangan harta dalam Islam yang komprehensif telah dibincangkan oleh Othman (2006) iaitu perancangan harta merujuk kepada suatu perancangan yang mampu dilaksanakan dengan cara seseorang semasa hayatnya memperolehi, mengurus dan mengagihkan hartanya kepada waris-waris dan benefisiari mengikut budi bicara serta adil di samping ia dapat mengawal, memantau dan memanfaatkan harta itu untuk penerima, dirinya dan keluarga semasa hayat dan selepas kematian. Perancangan harta juga merujuk kepada satu aktiviti merancang oleh seseorang individu untuk memindahmilikkan harta yang dimiliki kepada orang lain berdasarkan kepada hukum syarak (Sadali, 2006).

Perancangan harta dalam Islam terbahagi kepada dua keadaan iaitu perancangan harta semasa hidup dan selepas kematian pemilik harta. Antara bentuk perancangan harta semasa hidup adalah seperti hibah, wasiat, wakaf, sedekah dan nazar manakala pengurusan harta selepas kematian pula adalah pembahagian harta pusaka secara faraid. Walaupun faraid berperanan dalam urusan pembahagian harta selepas kematian, pengagihan melalui kaedah ini mampu menjurus kepada masalah-masalah tertentu jika tidak diuruskan dengan sempurna serta tidak difahami dengan betul. Sepatutnya pembahagian harta pusaka adalah kepada waris yang berhak serta membantu waris yang ditinggalkan untuk meneruskan kelangsungan hidup.

4. Kepentingan Perancangan Harta Dalam Islam

Menurut Muhamad Husni (2015) perancangan harta amatlah penting bagi memastikan harta sentiasa beredar dalam pelbagai sektor sehingga memungkinkan pengembangan harta dan penggunaannya secara meluas dan menyeluruh. Melalui pengurusan harta yang baik, ia dapat menjamin peredaran harta secara meluas berpandukan hukum Syarak agar ianya dapat dinikmati oleh masyarakat dan negara.

Menurut Imam Abu Ishak as-Shatibi pula selain dari untuk memelihara kemaslahatan atau kepentingan manusia dalam menjalani kehidupan di dunia, ia juga bertujuan memelihara kepentingan manusia selepas kematian mereka. Ini menunjukkan bahawa Islam membawa rahmat kepada manusia sekalian alam sebagaimana firman Allah (s.w.t) yang bermaksud iaitu: “Kami tidak mengutuskan engkau (wahai Muhammad), melainkan menjadi rahmat untuk semesta alam” (Al-Quran 21: 107).

Meneliti kembali kepada perbincangan berkaitan perancangan harta, ia bertepatan dengan maqasid syariah iaitu hifz al-mal. Syariah Islam dibina dengan asas untuk membawa kepada kebaikan dan menolak keburukan, dengan sifat keadilan, rahmat, kebajikan dan kebijaksanaan yang tulen untuk menyelesaikan masalah manusia dalam kehidupan dunia dan akhirat. Harta adalah nadi kehidupan manusia bagi menjamin kesejahteraan hidup. Oleh itu, Islam menggalakkan manusia untuk mencari rezeki dan memiliki harta dengan cara yang sah menurut syarak dan undang-undang.

Membuat kebajikan bukan sahaja kepada ahli keluarga. Harta yang diperolehi juga perlu dibelanjakan untuk kebajikan masyarakat umum (Mohd Zamro M & Mohd Ridzuan, 2006). Dalam hal ini, Islam telah menyediakan mekanisme bagi umat Islam untuk membelanja dan menggerakkan harta mereka untuk membantu kepada mereka yang memerlukan contohnya, melalui sedekah, hibah, wakaf dan sebagainya. Wakaf memainkan peranan dalam menyediakan

kemudahan asas kepada masyarakat seperti pendidikan, perumahan, kesihatan dan tempat ibadat. Begitu juga dengan pembentukan dana wakaf yang mampu menggerakkan harta yang diwakafkan agar ianya dapat digunakan manfaatnya oleh masyarakat. Di Malaysia, antara contoh dana dan harta wakaf yang ada ialah dalam bentuk masjid dan tanah perkuburan, surau, sekolah dan pondok pendidikan, ladang pertanian, kebun, dusun dan bendang, hasil sewaan tanah, tanah terbiar, bangunan (kedai, rumah kedai, kediaman), hasil sewaan bangunan, wakaf wang tunai, saham wakaf, wakaf saham, wakaf kaki, skim pelan takaful wakaf dan sebagainya (Siti Mashitoh, 2007). Melalui bentuk- bentuk wakaf ini, ia mampu menggerakkan harta yang dimiliki untuk manfaat bersama. Justeru itu, boleh disimpulkan bahawa Islam bukan hanya menyeru umatnya untuk mengumpulkan harta malah menggalakkan mereka membuat perancangan harta untuk kepentingan ahli keluarga dan masyarakat.

Selain itu, perancangan harta juga penting bagi menangani masalah berkaitan harta yang tidak dituntut. Dalam sebuah akhbar tempatan melaporkan terdapat sejumlah lebih RM65 billion harta pusaka di negara ini yang masih belum dituntut (Sinar Harian, 2020). Melihat kepada jumlah harta yang belum dituntut dan harta beku yang tinggi, sudah tentu ianya merupakan suatu kerugian bagi ahli waris khususnya dan juga negara amnya. Perkara ini pasti tidak akan berlaku sekiranya harta tersebut dirancang dan diuruskan dengan sebaik mungkin. Adalah amat penting bagi pemilik harta untuk merancang dan mengurus harta yang dimiliki semasa hidup demi kesenangan ahli waris terutama selepas berlakunya kematian. Tanpa pengurusan harta, perkara di atas akan berlanjutan dan ahli waris tidak mendapat faedah dan terhalang daripada menikmati harta tersebut. Hal ini bertentangan dengan kepentingan yang dijaga dalam Islam dan tidak mencapai maqasid al-syariah seperti yang telah dijelaskan sebelum ini.

Selain faraid, antara alternatif yang boleh dilakukan oleh umat Islam dalam menguruskan harta mereka ialah dengan melakukan perlantikan pentadbir pusaka semasa hidup bagi memudahkan proses pembahagian mengikut faraid, melakukan wakaf dan hibah (Ahmad Hidayat, 2007), membuat penamaan kepada anggota keluarga terdekat yang benar benar berhak untuk menerima simpanan mereka dan mengadakan surat wisoyah (Abdul Aziz, H & Yusmawati, 2006). Oleh itu, setiap individu yang memiliki harta perlu proaktif dalam menguruskan harta yang dimiliki mengikut kaedah yang telah digariskan oleh Islam termasuklah dalam soal perwarisan harta kerana apabila meninggal dunia nanti, maka ahli warislah yang akan menerima dan mengambil faedah daripada harta si mati.

5. Penutup

Berdasarkan kepada perbincangan di atas, dapat disimpulkan bahawa seseorang individu hendaklah mempunyai perancangan terhadap semua harta yang dimilikinya untuk memastikan bahawa harta tersebut dapat dinikmati secara berterusan sama ada untuk kepentingan dan kebajikan diri sendiri mahupun orang lain. Dalam hal ini, pelbagai aspek dan langkah yang harus diberi perhatian dalam membuat rancangan terutama dalam konteks pembahagian harta kepada yang selayaknya. Penulisan-penulisan yang ada telah membincangkan berkenaan kepentingan perancangan harta mahupun semasa hidup atau selepas kematian daripada pelbagai sudut dan pandangan. Namun demikian masyarakat Malaysia khususnya orang Islam kurang berpengetahuan dan kesedaran terhadap kepentingan dalam menguruskan harta dengan baik. Oleh itu, dicadangkan pendedahan awal berkaitan kepentingan perancangan harta perlu diberikan khususnya kepada pasangan muda yang akan berkahwin sebagai persediaan dalam menghadapi sebarang kemungkinan yang akan berlaku sekiranya berlaku perceraian atau kematian agar dapat mengurus dan merancang harta dengan baik bagi kehidupan yang lebih terjamin.

6. Rujukan

- Abdul Aziz, H., & Yusmawati, Y. (2006). "Perancangan harta di Zar Perunding Pusaka Sdn. Bhd.", dalam Siti Mashitoh Mahamood (ed.)(2006), *Harta Amanah Orang Islam di Malaysia*. Penerbit Universiti Malaya, Kuala Lumpur.
- Ahmad, H. B. (2007). "Prinsip dan Pelaksanaan Wasiat", dalam Ahmad Hidayat Buang (ed.) (2007). *Undang-undang Islam di Malaysia: Prinsip dan Amalan*. Penerbit Universiti Malaysia, Kuala Lumpur.
- Clifford, D. (2007). *Estate Planning Basics*. Nolo, USA.
- David A., & Wood, Glenn L. (1972). *Personal Financing Management*. Houghton Mifflin Company, USA
- Eu Jin, O. (2004). *Your Guide to Estate Planning and Administration*. Leeds Publications, Selangor.
- Kapoor, J. R. (2003). *Personal Finance*, c.7. McGraw-Hill Companies, n.n.p.
- Mancer, C. J. (1994). *Guide to New Zealand Estate Planning and Tax*. The Law Book Company Limited, Sydney, Australia.
- Mohd Zamro, M., & Mohd. Ridzuan, A. (2006). *Undang-Undang Pusaka Islam Pelaksanaan di Malaysia*. Jabatan Syariah, Fakulti Pengajian Islam, Universiti Kebangsaan Malaysia, Bangi, Selangor.
- Muhamad Husni Hasbulah & Mohd Zaidi Daud. 2015. 'Perancangan Pembahagian Harta Semasa Hidup dalam Islam: Konsep dan Kepentingannya'. *GJAT*. Vol. 5 ISSUE 1.
- Othman Yaacob (2006). "Pembentukan Trust Hibah Sebagai Alternatif Perancangan Harta". Dlm Siti Mashitoh Mahamood (ed). *Harta Amanah Orang Islam di Malaysia: Perspektif Undang-undang dan Pentadbiran*. Kuala Lumpur: Universiti Malaya.
- Prestopino, C. J. (n.d.). *Introduction to Estate Planning*. Dow Jones & Company, United States.
- Rusnadewi Abdul Rashid & Noor Inayah Yaakub. (2010) "Masalah kegagalan dan kelewatan pengagihan harta pusaka di Malaysia", Volume 5, No. 2.
- Rusnadewi Abdul Rashid & Nor Hisyam Ahmad (2013). "Pengurusan Harta Melalui Hibah: Kepentingan dan Manfaat Dari Pelbagai Aspek Untuk Kemajuan Ummah." *Jurnal Hadhari*, 5(1), 91–104.
- Sadali, R. (2006). *Personal Wealth Management for Muslims*. HTHT Advisory Services Pte Ltd., Singapore.
- Siti Mashitoh, M. (2007). "Pembentukan Dana Wakaf Menurut Perspektif Syariah Dan UndangUndang Serta Aplikasinya Di Malaysia", *Jurnal Syariah*, 15(2):69-70.

Tan, C., & Huan, J. (2004). Estate Planning Made Easy. Providend Pte Ltd., Singapore West.